

D'Geburt vo dr Runa - Mini Schwöschter chunnt uf d'Wäut

I g heisse Lisa und bi vieri. Gseht dir mi?
I g kuschele mit dr Mama im Bett.

Dr Papa und d'Lora mache scho mou ds Zmorge zwäg. D'Lora isch mis Gotti. Si bsuecht üs, wüu si üs wott häufe. D'Mama het nämlech es Bebe im Buch. Ihre Buch isch scho totau dick. D'Mama und dr Papa hei gseit, das Bebe chämi im Frühlig use. Jetz isches Frühlig! Es blüihe sogar scho d'Oschterglogge!

D'Mama passt chum no hinger ds Lavabo.
I g cha mängisch gschpüre, wie sich üses Bebe im Buch bewegt. Es cha ziemlich fescht schtrample. I g ou!

Bim Zmorge isst d'Mama gar nüt, nid emou e Honigschnitte. Si seit, es zieht ere im Buch.. "Es geit sicher scho gli los", seit si zum Papa. D'Lora und ig rüefe: „Juhui, hüt chunnt ds Bebe uf d'Wäut!“ „Jä, zerscht einisch abwarte, öbs schtercher wird“, antwortet d'Mama, „villicht sis jo gar keini richtige Wehe.“

Dr Papa schpiut mit mir Zirkus. D'Mama luegt gar nid richtig zue. Derbi si mir Akrobate und mache gfährlechi Kunschtschtück!

Mis Gotti het ganz viu Zyt für mi. D'Sunne schynt und d'Lora schpiut mit mir und em Fabio.
Dr Fabio isch mi Fründ, er isch ou vieri. Am liebschte boue mir im Sandchaschte Schtäu für üsi Houztier. I g ha drü und dr Fabio het fuf, er het sogar es Esufüli.

Woni ine wott go mis nöie Förkli hole, muess ig lysli si. D'Mama telefoniert im Gang. Mit dr Karin. Das isch üsi Hebamme.

Grad wonig mi ha fertig verchleidet, gsehn ig dr Karin ihres rote Outo.
„Da!“ rüeft dr Fabio. „Eui Hebamme chunnt!“
Hüt het si e grossi, farbige Koffere derbi. D'Karin isch lieb, si het mir mou e blaue Schtei gschänkt und ig darf mängisch mit ihrem Hörrohr schpile.
„Hallo Karin!“ rüefe mir, si lachet nume churz und geit schnäu is Huus.

Mängisch köhren ig d'Mama schtöhne und si schnuufed ou ganz lut. „Das isch ganz normau“, säge dr Papa und d'Hebamme. Mir ischs derbi e chli komisch

z'Muet. Guet, das d'Lora bi mir isch - und dr Fabio natürlech. Mir schpile nämlech jetze dusse Verchöiferlis. Ufem Stueu schteit dr Karin ihres Zeehteggeh. Mit däm chame ds Härz vom Bebe lose und da chunnt Papier use wie bi üsem Fax.

Zum Glück hei mir es Gäschte-WC. Is Badzimmer chanig nämlech nid, wüu d'Mama ir Badwanne hocket und d'Hebamme ihre dr Rügge massiert. Ds warme Wasser und d'Massaasch tüe dr Mama guet bi de Wehe.

Dr Papa schtrychelet dr Mama dr Buch und massiert dr Mama ihre Rügge. Dr Papa huißt so guet wie müglech bim Bebe-übercho. Das het er bi minere Geburt ou scho gmacht. Das isch früecher gsy, aber ig weiss es, wüu mir Biuder dervo im Fotoalbum hei.

Er Mama ihre Buch hanget chugelirund vom Bau abe und ihre Rügge cha sich entschanne. Ig nime dr Bau immer zum Hopse, aber nume wenn mi öper het.

Dr Fabio het nümme wöue mit mir schpile, wüu er immer mys Drüravelo het wöue ha. Da bini mit dr Lora wider is Huus inegange. Genau denn, wo ds Bebe richtig usem Buch vor Mama wott usecho!

Im Schlafzimmer isch dämmerigs Liecht und es schmöckt ou ganz anders aus süsch.

D'Heizig isch aglo, damit's ds Bebe kuschelig warm het.

Ou, d'Mama het ganz lut gschroue. Und nächhär köre mir ds Bebe! „Uääähhh!“ machts, aber wo's d'Mama i ihri Arme nimmt, wird's gly ruhig.

D'Mama und dr Papa und d'Lora gränne es bitzeli, wüu si so glücklech si. Sogar dr Karin si es paar Träne abegröuelet. Vor Fröid, wüu ig e Schwöschter ha. Juhui, ig hane Schwöschter!

Bim Düreschnyde vor Nabuschnuer häufe mir mit. Mä muess genau ufpasser, dass d'Chlemme richtig sitze, het d'Karin gseit.

Mini chlyni Schwöschter wird gmässe, gwoge, badet und gwicklet. Und ig darf derbi häufe. Ig cha das guet, wüu ig bi ja e grossi Schwöschter.

D'Karin ruumt ihri Hebammesache wäg. Ganz schön viu passt i sone Hebammekoffere.

Ig hane Arztkoffere, aber die isch viu chlyner. D'Papyrungerlage steckt d'Karin ine Küdersack.

Gly drufabe schtosse mir aui a, uf mini chlyni Schwöschter. Die Erwachsene trinke Sekt und ig trinke Chindersekt. Das isch eigentlech Minerawasser, aber i

mim Glas schprudlets genau so schön wie i den angere. „Härzleche Glückwunsch!“
säge aui, es isch ja ou Geburtstag.

Wo d'Hebamme Hei geit isches scho dunku. D'Mama, dr Papa und ig chöi üses
Bebe gar nid us de Ouge lo. Immer wider luege mir die chlyni Runa a.
Ja, mini chlyni Schwöschter heisst Runa. Dä Name find ig schön. Dä hei d'Mama
und dr Papa scho lang usgsuecht, aber bis jetzt isches es Gheimnis gsi.
D'Runa trinkt adr Bruscht vor Mama und schloft nächhär i.
Ig kuschele no mit dr Mama und em Papa im Bett. Und mit dr Runa.
Und morn tuen ig mir e Nabuschnuer flächte, nächhär schpili mitem Fabio
Geburt.